

松江府志（嘉慶） 九

松江府志四十一

名宦傳

明

湯和字鼎臣濠人幼有奇志從太祖定天下論功封中山侯進封信國公乞身賜鈔治第中都既倭寇上海帝顧謂和曰卿雖老強爲朕一行和請與方鳴謙俱鳴謙國珍從子習海事和乃度地浙西東竝海設衛所城五十有九選丁壯三萬五千人築之盡發州縣錢及籍罪人貲給役民不能無擾或謂和曰民嚮矣奈何和曰成遠算者不惜近怨任大事者不顧細謹踰年城成稽軍次

定考格立賞令民四丁以上者戶取一人戍之得五萬
八千七百餘人嘉靖閒東南苦倭患而金山衛青村所
南滙所立墩堡遇警舉烽首尾策應其功永賴焉卒年
七十追封東甌王諡襄武

明史參
陳志

仇成封安慶侯洪武十九年奉敕築金山衛城規畫創置

胥自成始

從信
錄

祝挺字正夫鄱陽人洪武初知上海縣時盜錢鶴臯倡亂
偽總兵姚某率衆偪縣治挺懷印走府謀討逆聞府城
陷乃仰天嘆曰縣我死所也效死弗去賊迫使見偽總
兵挺毅然曰吾有頭在勿復語賊知不可屈釋之乃密

遣人諭巨室以順逆有能擒賊者上汝功巨室遂具舟
治器械渡挺而東與前主簿鄭著王掎主簿李從吉等
聚義兵斬僞帥姚總兵金萬戶于西溝復縣治餘黨東
奔海謀復叛又遣唐翼等追斬之時右相國徐達遣偏
帥統兵破錢鶴臯將移兵縣境挺星馳詣帥曰苟降罰
罰我如撫民民則定矣無煩大軍三往返猶未止會鶴
臯忿邑人不附者指爲逆黨帥逮捕甚急且以窘挺挺
潛使報狀于右相國徐達達爲上聞按問得實乃釋時
鄰邑以誑誤死者相枕籍而上海獨晏然挺之力也楊

維禎爲文刻石紀其事

江西通志

名宦傳二

馮榮烏江人洪武初知華亭縣錢鶴臯據府叛榮被執不
屈縛置獄中亂定總兵葛俊怒從亂者欲盡殺之榮力
爭得止脫死者數萬戶

南畿志

李從吉靈石人少負奇概通兵略洪武初爲上海主簿錢
鶴臯倡亂劫知縣祝挺從吉奉挺密謀一鼓平之從吉
死妻劉營葬於縣西原二女耐焉

上海志

陳寧初名亮茶陵人元末爲鎮江小吏從軍至金陵代諸
將言事明太祖異之賜名寧授江南行省掾史歷中書
省參議吳元年出知廣德州遷浙江按察使洪武元年
召入爲司農卿遷兵部尙書二年出知松江府政尙嚴

明積賦竝集尋召爲尙書左丞

明史胡惟庸傳

李浩字師孟保定人歸附初同知府事均賦役平出納明

黜陟慎興革嚴關津清獄訟時稱爲循吏未幾召置機

近郭志

王文貞洪武六年以府同知署上海縣事時兵後教弛文

貞修復學校築射圃建觀德堂舉行鄉射禮又時臨講

堂訓勉諸生郡邑被其化焉

上海志

通志郭志皆列華亭上海新志
據顧彘學校記改歸上海從之

蔣惠鄱陽人洪武十一年知華亭縣先是縣誣平民李秀

三等三十人爲盜惠察其無辜立貰之乃密授方略獲

眞盜馬胡等十八人正其罪通志

胡儼字若思南昌人資性朴諒問學該博凡天文地理律

歷醫卜皆通其說洪武二十年舉于鄉授華亭教諭時

年尚少抗師道訓勵諸生敦行檢爲講說經史寒暑不

廢丁母憂去官服闋改長垣上疏乞近地養親改餘干

建文元年知桐城縣永樂初授翰林檢討歷侍讀諭德

國子祭酒兼侍講掌翰林院事洪熙元年以疾乞休加

太子賓客致仕祀郡先賢祠明史

蕭九萬南昌人洪武閒以歲貢爲諸暨丞博學能詞翰嘗

書容忍思慮四字疏其義揭門屏閒以誨訟者遷華亭

知縣疏民弊五事忤旨被逮臨刑齧指血錄詩報母云

微臣斬首丹心在尚有英魂返故鄉

通志

施之和福州人洪武閒下沙場副使轄一團至九團課繁

路遙心恤竈隱憂勞積疾卒於官

南淮志

杜鎰洪武末知上海縣其政以崇節儉黜華靡為本廉介

自信遇事明果吏畏而民懷之

顧志

甄庸北平人建文元年以戶部主事出為松江知府醇謹

嚴重以廉自防雖所得俸貲苟欲易一衣具一食必于

他郡營之常曰人非古人其避嫌疑不得不爾也事母

至孝仕至工部尚書致仕

畿輔通志參郭志

名宦傳二

周繼瑜松江同知燕師渡江瑜募兵勤王不克械至京磔
於市乾隆四十年

予謚烈愍

欽定殉節諸臣錄

夏原吉字維喆湘陰人洪武二十三年鄉舉授戶部主事
歷本部右侍郎充福建采訪使永樂二年蘇松大水以
戶部尙書奉命來治旣而上命僉都御史俞士吉齎水
利集賜之原吉乃集官屬吏民及凡諳曉水利之人博
求參考以浙西諸郡蘇松最居下流三江故道久湮難
可驟復而嘉定劉家港卽古婁江徑通大海常熟白茅
港徑入大江宜濬吳松江安亭諸浦引太湖水入劉家

白茅二港使直注江海而松江大黃浦乃通吳松要道
下流壅塞旁有范家浜至南踰浦口可徑入海宜濬令
深廣上承大黃浦以達泖湖之水此卽三江入海之故
跡條奏以聞疏見水利中上從之役夫十餘萬原吉布衣徒
步徧歷遐僻日夜經畫盛暑揮蓋去曰衆皆赤體曝日
中我何忍于是人爭盡力水患乃息歲饑奏發粟三十
餘萬石以賑之二年還朝復出治水水洩農田大利時
有奏以水退淤肥召民耕種以足國用者原吉曰民疲
極矣可加之重役乎卽馳奏得寢姚廣孝還自浙西上
詢之對曰夏原吉古之遺愛也三年秋八月召還掌部

事洪熙初進少保兼太子太傅卒贈特進光祿大夫太

師諡忠靖

明史

黃子威名輅以字行進賢人洪武末以儒士授長洲丞永

樂初擢刑部員外郎二年出知府事公勤剛果不惑儉

邪始至郡罹水患子威跋履鄉邑撫綏賑資民藉以存

活者甚眾三年政通人和上下信服以註誤及丁母憂

去民前後赴愬懇留者千餘人其後郡更三守而民念

之猶一日朝廷知之俾復任操履如初甚得時譽

江西通志

魏驥字仲房蕭山人永樂三年舉于鄉明年授松江府學

訓導汲汲以成就人材為務諸生讀書學宮常夜攜茶

粥勞問諸生益感激自奮滿九載諸生楊琪等詣闕乞
留時仁宗監國令還任復教三年十七年陞南京太常
博士正統中累官南京吏部尙書景泰元年致仕成化
七年卒年九十八諡文靖驥身不勝衣言不出口居家
二十年布袍糲食不治生產清德雅望爲海內宗而尤
得松人士心旣老猶手書往復不倦松人雖長子孫猶
曰吾祖吾父魏公門人也

明史

劉懋金山衛指揮僉事倜儻有才永樂十四年倭亂城陷
同官皆當論死懋疏言軍士差往各路采取營木及清
勾逃亡老弱賊衆兵寡帝命覆查事實竝得免死復職

金山

衛志

陳遜字必恭浦城人永樂十二年進士擢監察御史巡按

吳中上海民濮宗文聚無賴行劫官軍不能制密以方

略授守禦官擒之無一免者復捕蘇松諸民唐全等干

餘人民賴以安仕至雲南右布政卒于官囊無遺貲都

督沐昂為具棺斂還其鄉

郭志

韓陽字伯陽山陰人永樂十六年以鄉舉授松江府學訓

導操行清謹善教迪三載以父憂去再教丹陽薦為監

察御史陞湖廣僉事督學政終廣東左布政使

顧志

侯端字敬莊盱眙人永樂四年授金山衛指揮同知性嚴

毅剛勇以金山東南要害修城濠整器械練士卒爲戰
守備十七年倭寇登岸端與同知衛事卻清分兵出戰
清出南門軍覆賊入南門斷橋端軍東門不得入引兵
至西門橋亦斷仰天歎曰城亡與亡何偷生爲遂策馬
躍過濠衆不能繼與賊巷戰身被箭如蝟轉戰至衛門
賊驚曰好將軍也以所掠布橫於街欲生致之端劍挑
而截之會僉事施義兵至曰吾事濟矣乃同次於楊家
橋鳴鼓招散卒得百人令曰今潮退舟膠人持草束輦
礮至海灘焚其船賊不得歸遂大敗端有勇力府治石
狻猊高四五尺一手挽之行十餘步策馬過坊闕交手

攀楯兩股夾馬而懸之巷戰時一劍墮地所乘馬口銜

以授尤為奇異云

郭志參金山衛志

魏允韶江西人永樂二十二年進士歷四川道監察御史

宣德二年戶部言江南歲賦百萬轉輸領運未得其人

廷臣以允韶對遂命督漕比至值歲潦允韶撫諭諄切

歲終輸者六七即乘傳詣闕為民請命帝允其奏

郭志

方佐寧波人宣德初知上海縣明達世務清白愛民民亦

愛之

上海志

潘俊字文英清河人宣德中以鄉貢授松江通判清慎慈

祥才能理劇賦役有弗均者周知其數而均齊之秩滿

民欲借留會病卒於官

郭志

陳瑄字彥純合肥人少從大將軍幕以射雁見稱屢從征
有功建文末遷右軍都督僉事永樂元年封平江伯充
總兵官總督海運瑄言嘉定瀕海江流衝會海舟停泊
無高山大陵可依請於青浦築土山方百尺高三十餘
丈立墩表識既會通河成罷海運命瑄督漕運洪熙六
年乞於蘇松諸郡撥糧與附近衛所官軍運載至京量
給耗米及道里費軍民交便帝命尙書黃福等議行之
更民運爲兌運自此始也八年卒於官追封平江侯贈

太保諡恭襄

明史